

Чудеса святой блаженной Матроны

Молитвы о помощи в житейских нуждах. Акафист и житие
блаженной старицы Матроны



Коллектив авторов
Ольга Вега
Чудеса святой блаженной
Матроны. Молитвы
о помощи в житейских
нуждах. Акафист и житие
блаженной старицы Матроны

http://www.litres.ru/pages/biblio_book/?art=22971761
ISBN 9785448377266

Аннотация

Я рада поделиться рассказами о помощи святой блаженной Матронушки. Не надо отчаиваться. Обращайтесь за помощью к святым. Они по вере вашей всегда помогут вам! Слава Богу за все. Я благодарю святую блаженную Матронушку! Моли Бога о нас, грешных!

Акафист святой Матроне

Житие святой Матроны

Чудеса святой Матроны в моей жизни

Молитвы: святому архангелу Михаилу, святому архангелу Гавриилу, Николаю Чудотворцу, Пресвятой Богородице,

Серафиму Саровскому, «Взыскание погибших», Спиридону
Тримифунтскому

Содержание

Акафист святой блаженной Матроне Московской	6
Молитва	20
Конец ознакомительного фрагмента.	21

**Чудеса святой
блаженной Матроны
Молитвы о помощи
в житейских
нуждах. Акафист
и житие блаженной
старицы Матроны**

Составитель Ольга Вега

ISBN 978-5-4483-7726-6

Создано в интеллектуальной издательской системе Ridero

Акафист святой блаженной Матроне Московской

Кондак 1

Избранная Духом Божиим от пелен младенческих, блаженная старице Матроно, слепоту и немощь телесную ко очищению духовному от Бога приявшая, даром прозрения и чудес обогатилася еси и венцем нетленным от Господа украсилася еси. Сего ради и мы благодарне венец похвальный приносим ти, вопиюще: Радуйся, праведная мати Матроно, теплая о нас к Богу молитвеннице.

Икос 1

Ангел во плоти явилася еси на земли, Матроно блаженная, исполняющи волю Божию. Аще рождество твое в слепоте телесней бысть, но Господь, умудряяй слепцы и любяй праведныя, просвети духовнии очи твои, да прослужиши людям и дела Божии явятся чрез тебе. Мы же с любовью вопием ти таковая:

Радуйся, от младенчества Богом избранная;

Радуйся, благодатию Духа Святаго от пелен осененная.

Радуйся, даром чудес измлада обогащенная;

Радуйся, премудростию от Бога свыше исполненная.

Радуйся, мысленными очима волю Божию прозирающая;

Радуйся, слепотствующим умом мудрецов века сего посрамляющая.

Радуйся, души заблуждшия к Богу приводящая;

Радуйся, скорби и печали утоляющая.

Радуйся, праведная мати Матроно, теплая о нас к Богу молитвеннице.

Кондак 2

Видяще людие и иерей, егда крещаше тя, блаженная, чудный столп облачный над главою твоею и обонявше благоухание велие, дивляхуся, что убо сия отроковица будет, поюще Богу:

Аллилуиа.

Икос 2

Разум имея просвещенный, иерей Божий Василий позна, яко крещаемая от него сосуд благодати Божия есть, и ты, праведная Матроно, отроковицу святу нарече. От нашего же усердия приносим ти похвалы сия:

Радуйся, во святей купели благодатию Святаго Духа благоуханная;

Радуйся, на персех твоих крест запечатленный имевшая.

Радуйся, молитвеннице, от Бога людем дарованная;

Радуйся, свеще неугасимая, пред Господем сияющая.

Радуйся, даром чудотворения от Бога прославленная на земли;

Радуйся, венцем неувядаемым от Господа увенчанная на Небеси.

Радуйся, милости Божия грешным возвещающая;

Радуйся, от источника воды живыя жаждущия напаяющая.

Радуйся, праведная мати Матроно, теплая о нас к Богу молитвеннице.

Кондак 3

Силу Божия благодати ощущаючи, еще во младенчестве сущи, Матроно блаженная, ко иконам святым устремлялася еси и чистым сердцем и младенческими усты хвалу Богу возглашала еси:

Аллилуиа.

Икос 3

Имущи от Бога дар прозрения издетска, блаженная мати, сокровенная сердец приходящих к тебе ведущи и оным будущая, яко настоящая, сказующи, многия люди на путь благочестия направляла еси. Темже прославляюще Бога, умудряющего слепцы, вопием тебе сице:

Радуйся, дивная провидице;

Радуйся, сокровенных грехов обличительнице.

Радуйся, помраченных душею пресветлая наставнице;

Радуйся, заблудших милостивая путеводительнице.

Радуйся, звездо, верным путь указующая;

Радуйся, свеще, во тьме века сего светящая.

Радуйся, единому Богу послужившая;

Радуйся, козни диавольския благодатию Духа Святаго поправшая.

Радуйся, праведная мати Матроно, теплая о нас к Богу молитвеннице.

Кондак 4

Буря недоумения и смятения о чудесех твоих в людех развееся, мати блаженная, и тии, вразумившу их Господу, дивному во святых Своих, православиша и восхвалиша тя, Богу же с благодарением воспеша:

Аллилуиа.

Икос 4

Слышавше людие, мати Матроно, яко помощь в недужех душевных и телесных подаеши, прихождаху к тебе со упованием и, совет благоприятен и исцеление получивше, благодаряще Бога, воспеваху тебе:

Радуйся, яко болезнующих и страждующих душею приемлеши;

Радуйся, яко мир душам скорбящим даруеши.

Радуйся, в заблуждениях сущих вразумительнице;

Радуйся, благочестия учительнице.

Радуйся, печалей наших утешительнице;

Радуйся, в скорбех утешительнице.

Радуйся, недугов всяческих безмездная врачевательнице.

Радуйся, праведная Матроно, теплая о нас к Богу молитвеннице.

Кондак 5

Боготечная звезда возсияла еси, мати блаженная Матроно, во дни лихолетия во Отечестве нашем, яко новая исповедница, иго Христова дерзновенно и безбоязненно чрез все житие пронесла еси и, благодатию Божиею укрепляема, подавала еси недоумевающим вразумление, страждующим ослабу, больным исцеление, благодарственно зовущим Богу:

Аллилуиа.

Икос 5

Видевше мнози Российстии людие чудеса и исцеления, Божиею благодатию от тебе подаваемая: хромым – хождение, расслабленным и на одре лежащим – исцеление, беснующимся – духов злобы отгнание, устремишася к тебе, мати, яко к источнику неисчерпаемому, от него же испивше обильно, умилненным сердцем возопиша тебе таковая:

Радуйся, на путь правый от младенчества призванная;

Радуйся, праведнице, от Бога нам дарованная.

Радуйся, целительнице, недуги наша исцеляющая;

Радуйся, в нуждах наших скоро помогающая.

Радуйся, душеполезными советы нас вразумляющая;

Радуйся, недоумения наша скоро разрешающая.

Радуйся, духи нечистыя от человек отгоняющая;
Радуйся, от всякого зла молитвою твоею ограждающая.

Радуйся, праведная мати Матроно, теплая о нас к Богу
молитвеннице.

Кондак 6

Провозвестник святости и праведности жития твоего,
блаженная мати, явися святой отец Иоанн Кронштадтский,
егда узре тя во храме и наименова тя свою преемницу, таже
и осмый столп России. Все же, слышавше сие, прославиша
Господа, возглашающе Ему песнь:

Аллилуиа.

Икос 6

Возсия молитвами твоими, мати Матроно, свет благодати
Божия в сердцах, не ведущих Бога и грехми многими про-
гневливающих Его. Тии же, видяще чудеса, тобою совершае-
мая, обращахуся ко Господу, ублажающе тя сице:

Радуйся, подвиги твоими Бога прославляющая;

Радуйся, славу Божию нам являющая.

Радуйся, неверныя на путь правый наставляющая;

Радуйся, грехми оскверненныя молитвами твоими очи-
щающая.

Радуйся, к покаянию нас призывающая;

Радуйся, за вся благодарити Господа нас вразумляющая.

Радуйся, храм Божий любити нас научающая;

Радуйся, во ограду церковную расточенныя овцы собирающая.

Радуйся, праведная мати Матроно, теплая о нас к Богу молитвеннице.

Кондак 7

Хотящи Пресвятую Владычицу нашу Богородицу достойно ублажити, мати Матроно повелела еси людем написати всечестный образ Ея, «Взыскание погибших» именуемый, и в храме Божием веси твоя водворити, да вси, взирающе на светлый лик Пречистыя, со умилением восхвалят, Господу же возопиют:

Аллилуиа.

Икос 7

Новую тя заступницу, молитвенницу и ходатаицу к Богу дарова Господь в годину тяжкую людем Российским, мнози бо отпадаху от Святыя Церкви, ты же, мати, маловерныя и заблуждшия наставляла еси словом и делом, являющи дивная чудеса Божия. Темже воспеваем ти сице:

Радуйся, страны нашея Российския неусыпная печальнице;

Радуйся, спасения нашего ходатаице.

Радуйся, Бога, Судии праведного, умилолюбительнице:

Радуйся, недужных и обидимых покровительнице.

Радуйся, немощных и безнадежных помощнице;

Радуйся, противу духов злобы непрестанная воительнице.

Радуйся, яко трепещут тя князи бесовстии;

Радуйся, яко радуются о тебе ангелы и человецы.

Радуйся, праведная мати Матрона, теплая о нас к Богу молитвеннице.

Кондак 8

Странно маловерным и неразумным бысть, како слепорожденная видети и ведети может не точию настоящая, но и будущая, не ведяху бо силы Божия, в немощи человечестей совершаемая Мы же, блаженная мати, премудрость Божию, в тебе явленную зряще, вопием Богу:

Аллилуиа.

Икос 8

Всяческия досаждения и обиды, изгнания и укорения претерпела еси, блаженная мати, не сетующи о сем, но за вся благодарящи Бога. Сим же и нас научаеши терпеливно нести крест свой, тебе же благохвалити тако:

Радуйся, в молитве непрестанно пребывавшая;

Радуйся, духов злобы постом и молитвою отгнавшая.

Радуйся, мир благодатный стяжавшая;

Радуйся, любовью твоею многия окрест тебе спасавшая.

Радуйся, житием твоим изрядно людям послужившая;

Радуйся, и по кончине твоей людям непрестанно помогающая.

Радуйся, и ныне нашим прошением тепле внимающая;
Радуйся, уповающих на помощь твою не оставляющая.

Радуйся, праведная мати Матроно, теплая о нас к Богу
молитвеннице.

Кондак 9

Всякия скорби и болезни аще и претерпела еси, мати Матроно, непрестанно ведущи брань с силами тьмы, обличающи козни и коварства их и изгоняющи бесы от одержимых, обаче до кончины дний твоих помогала еси страждующим, недугующим и скорбящим, присно поющи Богу:

Аллилуиа

Икос 9

Ветии многовещаннии не возмогут достойно прославити святое житие твое и чудеса, силою Божиею тобою творимая, предивная старице. Мы же, хотяще псаломски хвалити Бога во святых Его и подвигаемии сердечною любовью, дерзаем пети тебе таковая:

Радуйся, узкий путь и тесная врата избравшая;

Радуйся, добродетельми многими просиявшая.

Радуйся, вся тленная в житии твоём отвергшая;

Радуйся, смирением, яко венцем драгим, украшенная.

Радуйся, евангельски, яко птица небесная, на земли пожившая;

Радуйся, Сыну Божию, не имевшему, где главу подклони-

ти, последовавшая.

Радуйся, ныне во обителях райских веселящаяся;

Радуйся, и нас, грешных, молящихся тебе, милостию твоею не оставляющая.

Радуйся, праведная мати Матроно, теплая о нас к Богу молитвеннице.

Кондак 10

Спасти хотящи многия люди от страданий телесных и душевных недугов, всенощно пребывала еси, праведнице Божия, в молитве, просящи им помощи и укрепления от Господа нашего Иисуса Христа, поющи Ему:

Аллилуиа.

Икос 10

Стена и покров была еси во дни жития твоего, блаженная мати, всем к тебе прибегающим, и по смерти не престаеши ходатайствовать пред Богом о людех, с верою притекающих ко гробу твоему. Темже убо, услыши ныне и нас, грешных, скорбьми, болезнями и многими печальми одержимых, и потщися на помощь твоими молитвами, всем, к тебе вопиющим:

Радуйся, обидимых скорая предстательнице;

Радуйся, терпящих лишения утешительнице.

Радуйся, честного супружества охранение;

Радуйся, всех во вражде сущих умирение.

Радуйся, неправо на суд влекомых защитительнице;

Радуйся, и о виновных пред судом земным к Богу милостивая ходатаице.

Радуйся, всех к тебе взывающих заступнице.

Радуйся, праведная мати Матроно, теплая о нас к Богу молитвеннице.

Кондак 11

Пение ангельское слышала еси, мати честная Матроно, еще на земли живущи. Научи и нас, недостойных, како подобает славити Бога, в Троице почитаемаго, Отца и Сына и Святаго Духа, Ему же непрестанно воинства небесная всегласно воспевают:

Аллилуиа.

Икос 11

Светозарным светом сияет житие твое, блаженная Матроно, освещаая мрак многосуетнаго мира сего, и влечет к себе души наша, яко да и мы лучею благодати Божия озаримся и скорбный путь привременныя жизни богоугодно пройдем и Царствия Божия достигнем, идеже ты, мати, ныне вселилася еси, слышащи глас наш, тебе зовущих:

Радуйся, свеще Божия, присно горящая;

Радуйся, бисере честный, блистанием святыни твоя нас озаряющий.

Радуйся, цвете благовонный, Духом Святым нас благо-

ухающий;

Радуйся, каменю веры, малодушныя в благочестии утверждающий.

Радуйся, звезда пресветлая, правый путь нам указующая;

Радуйся, добрая воительнице Христова, мечем молитвы демонския полки устрашающая.

Радуйся, яко все житие твое свято и непорочно;

Радуйся, яко и смерть твоя пред Господем честна.

Радуйся, праведная мати Матроно, теплая о нас к Богу молитвеннице.

Кондак 12

Благодать Божию обильно еще от пелен восприяла еси, мати блаженная, яже выну пребысть с тобою по вся дни жизни. Веруем несумненно, яко и по успении твоем благодать сия пребогато пребывает с тобою. Сего ради припадающе молимся: не лиши и нас, еще странствующих на земли, помощи твоя и заступления, просящи Господа помиловати всех, поющих Ему:

Аллилуиа.

Икос 12

Поюще многая и дивная твоя чудеса, мати Матроно, восхваляем Бога, даровавшего граду Москве и Отечеству нашему во дни безбожия и гонения твоего, непоколебимый столп благочестия и веры. Ныне же, блаженная мати, благодарным

сердцем воспеваем тебе сице:

Радуйся, мир Христов в душе твоей стяжавшая;

Радуйся, сего ради многия люди окрест тебе к Богу приведшая.

Радуйся, в немощном теле сущи, силу Божия благодати показавшая;

Радуйся, во обретении честных мощей твоих Божию милость нам явившая.

Радуйся, сонма святых московских изрядное процветение;

Радуйся, града Москвы преславное украшение.

Радуйся, Отечества нашего присная пред Богом печальнице;

Радуйся, к покаянию и молитве о земли Российской всех призывающая.

Радуйся, праведная мати Матроно, теплая о нас к Богу молитвеннице.

Кондак 13

О блаженная мати, услыши ныне воспеваемое тебе хвалебное пение и испроси нам у Господа Иисуса Христа грехов оставление, христианския мирныя кончины и доброго ответа на Страшном судищи Его, да и мы с тобою сподобимся в селениих райских славити Святую Троицу, вопиюще:

Аллилуиа.

(Сей кондак 13 читаем трижды! А после читай икос

1 и кондак 1.)

Молитва

О блаженная мати Матроно, душею на Небеси пред Престолом Божиим предстоящи, телом же на земли почивающи и данную ти свыше благодатию различные чудеса источающи! Призри ныне милостивным твоим оком на ны, грешныя, в скорбех, болезнех и греховных искушениях дни своя иждивающия, утети ны, отчаянныя, исцели недуги наши лютыя, от Бога нам по грехом нашим попущаемыя, избави нас от многих бед и обстояний, умоли Господа нашего Иисуса Христа простити нам все наши согрешения, беззакония и грехопадения, имиже мы от юности нашея даже до настоящего дне и часа согрешихом, да твоими молитвами получивше благодать и велию милость, прославим в Троице Единобога, Отца и Сына и Святаго Духа, ныне и присно и во веки веков.

Конец ознакомительного фрагмента.

Текст предоставлен ООО «ЛитРес».

Прочитайте эту книгу целиком, [купив полную легальную версию](#) на ЛитРес.

Безопасно оплатить книгу можно банковской картой Visa, MasterCard, Maestro, со счета мобильного телефона, с платежного терминала, в салоне МТС или Связной, через PayPal, WebMoney, Яндекс.Деньги, QIWI Кошелек, бонусными картами или другим удобным Вам способом.